

Departamento di Agricultura, Cria y Pesca dunando sosten na e sector primario


“Santa Rosa orguyosamente a finalisa e reconstruccion di Pos di Pavia”



ORANJESTAD- Dia 24 di september tabata un dia sumamente special pa e bario di Pavia como tambe pa e sector primario, unda cu Departamento di Agricultura, Cria y Pesca a finalisa nan proyecto di reconstruccion di Pos di Pavia. Durante e atardi aki Minister Otmar Oduber tabata presente unda cu e mandatario a dirigi palabra expresando

su orguyo y sosten pa cu e proyecto aki. Pa mas cu 80 aña e Pos di Pavia a provee e bario y vecindario cu awa dushi cual awa tabata sumamente esencial pa e sobrevivencia di a habitantenan kende e tempo ey no tabata conta cu un planta di awa ainda. Despues di e establecimiento di WEB e necesidad y uzo di e awa di Posnan a baha dras-

ticamente unda cu hopi a bay perdi completamente. Mirando cu pueblo ta bibrando mas consciente riba nan salud y e demanda pa productonan produci localmente ta creciendo dia pa dia, Departamento di Agricultura, Cria y Pesca a inicia un proyecto di reconstruccion di Posnan di awa dushi, asina dunando sosten na e Agricultor y Criadonan



local.

E pos di Sabana Liber como tambe e Pos di Pos Grandi ya a wordo reconstrui y a demostra di ta un sosten grandi na e Agricultor y Criadonan di nan bario.

Durante e atardi di 24 di september a nombra Sr. Mario Fingal ta maneha e pos kende lo percura pa cuida esaki y sigura cu e ta wordo uza apropiadamente. Tambe a duna homenahe na e padvinderman di Centro Sonrisa kende a planta 3 mata di fruta y asina uni nan mes na e grandioso proyecto di 10 mil mata di fruta di Santa Rosa. Directora di Stichting Monumentenfonds tambe tabata presente unda cu hunto cu Directora di Santa Rosa y Minister Oduber a firma e traspo oficial di e

posnan aki.

Tabata un momento sumamente emocional ora cu despues di hopi aña a los e brake y asina awa dushi a cuminsa circula un biaha mas pa e tanki.

Departamento di Agricultura, Cria y Pesca ta demostra un biaha mas cu e Departamento ta trahando directamente pa e Agricultor y Criadonan local.

Santa Rosa ta extende palabranan di gradicimento na Minister Oduber pa su sosten y vision pa cu e Departamento como tambe na e Padvinderman di Centro Sonrisa kende a demostra nan amor pa Agricultura y kende sigur lo uza e awa dushi di e Pos di Pavia pa mantene nan matanan di fruta. □

